

靜
志
居
詩
話

靜志居詩話卷五

秀水朱竹垞先生著

扶荔山房編輯

周致堯字煥文崇德人平江書院山長有山長集
山長舊有鈔集存崇德縣學有閩人知縣事者攜之歸
遂失傳今所存者攜李英華湖海耆英集所收一二而
已曹能始石倉詩選載山長詩較富或在閩得覩其全
爾子友高念祖謂予山長名棐以字行而蔣布衣楚稗
則云字煥文致堯其名攷陳緝熙文有送周煥文從唐
伯剛之吳興作疑布衣之言得其實也

劉渙字彥亨紹興山陰人至正間薦授三茅書院
山長道梗不赴卒于洪武間

彥亨受學楊門不離書樓舊染

凌雲翰字彥狝錢塘人元末蘭亭書院山長洪武
初以薦授四川成都教授有柘軒集

柘軒學於陳衆仲故其詩華而不靡馳騁而不離乎軌
五言如陪祭作七言如鬼獵圖才情奔放不可羈勒直
可舉郁離之旗摩青邱之壘集中與張行中論詩云艱
深文淺近臭腐化神奇每到真成趣由來不費辭其自

得之深矣

又云畫終南進士者南唐周文矩蜀石恪汴京楊槩其
初類設色爲之至龔高士聖子易以深墨其法師趙千
里丁香鬼離奇變化自比書家草聖于是詩林多作長
歌自聖子而外若宋子虛李鳴鳳王肖翁韓性陳叔方
楊廉夫李宗表劉伯溫各事摹寫要未若柘軒之淋漓
盡態也

按彥神鬼獵圖歌云終南進士乃好武野魅山精皆
部伍蒐田也欲從四時作氣恍如聆一鼓銅鉦先鳴

地欲裂阜蓋後張風爲舉蹇驢足跛不受鞭良犬尾
搖何用組錦條未許縱蒼鷹鐵絙猶能縛元虎跳跟
衆鬼爲卒徒矍鑠一翁作謀主或爲狼顧背拔鎗或
作猿升前試斧鴟鳴口應已張弓蛇偃肩擔來殼弩
身憑大盾宛轉遮手弄飛槌高下舞坐作擊刺衆莫
當進退超驤孰敢侮猙獰似覺口吐牙輕捷渾疑臂
生羽逐禽不假御車輿獲獸何勞施網罟亦如塵世
有司存頗類神仙足官府畫工後輩效前人戲筆何
年追舊譜已無吳生名擅場復有顏輝好奇古周易

取象車載一韓子送窮名數五如斯情狀不易知更
欲形容亦良苦且須畱取作歲除竹爆一聲春滿宇
胡奎字虛白海寧人寧府敎授有斗南老人詩集

虛白泊舟鄱陽望湖亭見石刻東坡黑雲推雨未遮山
絕句次韻和之書之於壁俄見一隻來誦其詩曰子非
斗南老人邪乃爲長揖回顧不知所之因以斗南老人
自號高青邱贈胡校書詩所云簸弄明月琵琶洲者是
已其詩功力旣深格調未免太熟誦之若古人集中所
已有者吾鄉雲東逸史曾手書其橐舊藏項氏天籟閣

繼歸高氏稽古堂今爲華山馬思贊所藏余借觀錄其
六首

李延興字繼本東安人占籍北平至正丁酉進士
授太常奉禮兼翰林檢討洪武初屬典邑校有

一山集

一山北方之學者其詩文頗拔俗長歌尤擅場洪武中
雖未仕于朝集有與友人書云從東安丞李遂招致親
夏楚事未幾逼爲訓導又有移教房山畱別雄縣周尹
詩又涑水縣學記云延興猥以謏才代匱學職又自敘

云洪武戊午永清劉宰招致攝其鄉學則其典邑校者
屢矣故自贊畫像有云雖同乎今之人而以聖賢爲矩
墨雖食夫今之祿而視軒冕猶泥塗然一山本元進士
而上總戎詩則曰大將軍出沙漠萬里河山盡開拓獲
其名王歸四面凱聲作功成獻俘蒲萄宮天清日白開
鴻濛遂使樓煩之壤化爲冠帶衍爲提封未免言之太
盡無復一成三戶黍離麥秀之思矣

袁華字子英崑山人洪武初府學訓導有可傳集
子英名其集曰可傳東維子序之曰吾鐵門稱能詩者

南北凡百餘人求如張憲及袁華輩者不能十人又題
呂誠敬夫詩曰蘇支邑凡六獨崑山多才子魁出者往
往稱呂袁子英敬夫也然其序郊韶九成詩則曰吾求
之東南永嘉李孝光錢唐張天雨天台丁復項炯毗陵
吳恭倪瓚有本者也近復得永嘉張天英鄭東姑蘇陳
謙郭翼而吳興得郊韶也序郭翼義仲詩曰合吾之論
者斤斤四三人焉蜀郡虞公集永嘉李公孝光東陽陳
公樵其人也繼其緒餘者亦斤斤得四三人焉天台項
炯姑胥陳謙永嘉鄭東崑山郭翼也顧子英不與焉然

則東維子之餘論固無一定矣東維與李五峰論詩謂梅一於酸鹽一於鹹食鹽梅而味常得於酸鹹之外若子英之詩僅一於酸鹹而已羲仲卒于至正二十四年朱珪名蹟志載有盧熊墓志可據虞山錢氏乃云洪武初徵授學官度不能有所自見怏怏而卒誤矣

邵亨貞字復孺嚴州人徙居華亭明初爲松江府學訓導有蛾術集

貞谿詩辭氣和易比於袁景文管時敏則不及方諸陶九成顧謹中似爲過之

附錄愚山云復孺自號貞谿有詩帖云僕僕從軍吳
秀間近始謁告還家有儒冠不解明韜略之句錢應
庚詩帖云復孺先生自軍中回署其年至正乙巳也
王原吉詩稱復孺爲屯田復孺祭伯文云己亥之歲
以屯役宿畱吳門則復孺蓋嘗有事行間也

虞堪字克用一字勝伯宋丞相雍公八世孫家長
洲洪武中爲雲南府學教授有鼓柶橐

勝伯避兵笠澤吳興施縉爲創義塾延以爲師趙郡蘇
大年會稽姜漸爲紀其事又力購雍公遺文刊行一時

名士若遂昌鄭元祐吳郡沈右呂楨王謙周砥鄒奕豐
城余詮魏文彝會稽韓友直陶澤高平范成張緯王廓
臨邛魏奎河東王嘏薊邱聶鏞大梁申屠衡蜀王立中
黃夔咸賦詩美之今雍公集終無傳惜矣鼓柅集中題
松雪畫一絕特工其詩云王孫今代玉堂仙自畫茗溪
似輞川如此青山紅樹底可無十畝種瓜田

顧祿初名天祿字謹中松江華亭人明初以國子
生除太常典簿遷蜀王府教授有經進集

謹中過鄱陽湖賦詩云臨行釃酒酌湖神打鼓開船出

要津雲霧氣蒸迷日月波濤聲撼震乾坤放歌今日容
豪客破敵當年想至尊咫尺南昌城郭近且將雙足洗
征塵孝陵聞之命盡進所作披之便殿桂彥良所云秀
句新傳鳳榻前是也說者謂因破敵句受知竊疑正韻
書成無有遵之作律詩者謹中特合真元韻竝用此其
所以深契帝懷爾

黎貞字彥晦新會人洪武初舉邑訓導不就坐事
戍遼東尋放還有秣坡集

秣坡爲孫仲衍門人仲衍就誅解衣裹尸負其棺萬里

歸葬鄭巨君而後不多見也陳公甫云高山景行吾鄉
先輩黎秣坡一人而已其推崇若此詩多庸實子游嶺
南借得鈔本錄其行路難一篇

鄭涪字起深黃巖人洪武末爲樂清訓導有直正
齋集

廣文詩不多傳跌宕自喜

鄭真字千之鄞縣人洪武壬子鄉試第一授臨淮
教諭秩滿入京賜燕陞廣信教授引年歸有榮

陽外史集

千之文極爲宋潛溪推重裴典簿中嘗屬其撰著存堂
記別請潛溪爲之千之記先成潛溪見而歎曰人徒慕
吾名爾使我執筆焉能過之後數年典簿復請於潛溪
答曰有鄭先生記在發明洞徹使之獨步可也千之既
領解與計吏偕除臨淮儒學教諭歷九年進牌朝於奉
天門七奉天殿十四華蓋殿二十七文華殿三武英殿
一中右門二賜酒饌者十一命賦早朝賜宴及續御製
菊綻西風露脂楓葉等詩徵員之受恩遇至矣攷明初
士子舉于鄉者例稱鄉貢進士樊餘慶詩云聖代新開

進士科而千之送閩人黃彥機詩亦云兩省同年進士科是也如南海孫蕢番禺李德皆鄉貢進士而緝地志者削去鄉貢字竟稱進士錢氏列朝詩集遂謂蕢中洪武三年進士不知洪武三年第下科舉之詔以是年八月爲始未嘗會試天下士後雖下三年疊試之詔惟辛亥有登科進士爾此一誤也嘉興湖州二府明初屬之直隸故實錄於洪武九年十二月書直隸湖州嘉興諸府水災遣戶部主事趙乾等賑給十一年五月敕工部定歲造軍器之數其書湖州嘉興亦冠以直隸字至十

四年四月復置巡檢司嘉興府一嘉興縣之杉青牯湖州府三烏程縣之後潘德清縣之下塘新市仍以直隸文冠之考是年十一月始以二府改隸浙江布政司故千之跋同年錄云洪武壬子秋浙省承詔旨合九郡之士試之得四十名上諸京師又送何本道還金華序云洪武五年詔命三年疊試於是浙江所屬九郡以其名上之行省而金華何本道與焉其云九郡者嘉湖二府斯時尚屬南畿不在其內也庚戌鄉試中式相傳嘉興則有許信孚俞志文馬思明王鏞毛永昇潘椿年朱楨

王貞海鹽則有盛潛德清則有王軫此當載於南國賢書不當載於浙士登科錄顧張氏朝瑞宜書而不書陳氏汝元不當書而書又一誤也壬子浙闈千之名居第一是科四十人中式故王用吉詩云桂籍題名四十人明州自鄭真外有郭可學樊餘慶黃夢熊顧厘吳振王廷直王用吉孫原仲吳倫陳希貢汪義方何操陳仲賢汪瓚共一十五人若陳氏所載鄞縣王諒王道顯二人明州府鹿鳴宴不之及我不敢信也又黃自強王景何本道見於千之他文上虞李繼先烏程陳咨見於府縣

志餘若王麟王驥趙惟一杜誼沈新民徐思誠翁希顏
俞尙禔駱文凱吳佐俱載陳氏錄中姓名可知者三十
人顧陳氏以真倫元仲義方希貢餘慶分屬之辛亥科
此又一誤也草昧之初舊聞放失總緣修地志者不得
其人於古事則芟除之於近事則混書之譌以傳譌非
得滎陽外史百卷集何由訂其實乎

陳燧字民初永嘉人訓導

民初詩不多見送邵鍊師作亦稱具體他如江湖千里
去來易故舊一尊離別難正自不俗

陶振字子昌吳江人徙居華亭洪武中舉明經授

吳江縣學訓導改安化教諭有釣鼇集

子昌詩多率爾成篇故選家恒置不錄其哀吳王濞長
歌云哀吳王汝非他人姓系本卯金刀高祖封汝沛五
十三城壞冀汝犬牙相制磐石牢汝胡招致亡命卽山
鑄錢海水私自熬下收民心蠲賦徭睥睨劉家社稷使
動搖汝之初有反相高祖臨遣汝訓戒嘗昭昭汝後以
子故失藩臣禮文帝不加戮賜汝几杖老不朝汝之末
反兵起馳書六國膠東膠西並受招連山大澤羅旌旄

景帝又殺諫臣錯謝六國復汝削地赦汝元惡而頭不
汝梟汝胡殺使者不奉詔氣益驕嗚呼吳王汝獨不聞
前時烹韓盧醢彭越翦伐九江王布如蓬蒿胡乃視死
輕鴻毛漢家條侯將中豪奉揚天兵誅汝曹劓汝腸躐
汝血擣汝穴破汝巢汝子授首汝母將安逃致令六國
灰飛而煙消嗚呼哀吳王汝之罪何滔滔千古竹帛猶
腥臊斯蓋指斥長陵而作顧紀述建文遺事者莫之采
焉因具錄之

附錄愚山云振歸隱九峰間授徒自給一夕死於虎

王達善輓詩云昔爲海上釣鼉客今作山中飼虎人
釣鼉客振自號也

張時字敏中錢唐人洪武中訓導有自怡集

張君自怡集鄉里罕傳康熙戊寅客福州從林秀才侗
借觀鈔本錄其二首歸詢之武林耆舊未有知其姓氏
者矣

劉仔肩字汝弼鄱陽人洪武初用薦應召至京

汝弼一應鶴書旋集都人士詩爲雅頌正音而以已作
附之殆游大人以成名者是時許中麗仲孚則編光岳

英華偶桓武孟則編乾坤清氣賴良善卿則編大雅集
沈異士偁則編明詩選雖擇焉不精然草昧之初干戈
甫戢風雅未墜於地至今得存不可謂非羣賢揚扆之
功也

陳謨字一德號心吾泰和人明初聘脩禮書辭歸
有海桑集

徵君大德遺民雖應弓招未縻好爵楊東里梁不移皆
其弟子洪武庚戌曾校文廣東則孫仲衍乃其所取士
矣又嘗主奉新清節書院講席其沒也蘇平仲輓以詩

云道德宗前代詩書啓後人胡光大詩云文章漢彝鼎
聲價魯璠璣楊詩云純明程伯子灑落邵堯夫梁詩云
立志希濂洛研精續考亭諸公推許若是其論詩云稱
詩者曰寂寥乎短章春容乎大篇短章貴清曠纏絲涵
思深遠造其極者陶韋是也大篇貴汪洋閱肆開闔變
化不激不蔓超乎人者李杜是也韓退之蘇子瞻二公
雄渾傑特非絺章繪句之比此詩之至也知言哉

附錄劉子高云先生鉅篇大軸流播郡邑幅巾野服
翱翔山水之間門生兒子扶攜後先使人望而敬之

狎而愛之

金信字中孚金華人以茂才舉不就隱居自怡人

稱漫吟先生有春草軒集

中孚爲鐵厓入室弟子嘗序其詩云金華金信從予游於松陵澤中談經斷史於古歌詩尤工如古琴操趙璧辭荆卿篇博浪椎月支王頭飲器歌其氣充其情激其辭鬱以諧吁信之詩有法矣今鐵厓所稱諸篇皆不可得見惜也阮元聲金華詩粹謂仲孚於明初召入中書省進講經史以實錄考之蓋至正戊戌年事

郝經字仲誼仁和人元進士有玩齋橐

仲誼元之舊臣沐景暉編滄海遺珠以其詩壓卷蓋明
初徙滇者也虎邱詩集一卷王高士賓所錄吾鄉項氏
萬卷樓藏書也中載仲誼登虎邱賦呈居中長老詩起
句云虎邱山前新築城虎邱寺裏斷人行同時和者呂
敏志學云山上樓臺山下城朱旗夾道少人行曾樸彥
魯云闔閭冢上見新城無復行人載酒行僧寧居中云
公餘聯騎入山城老衲追陪得散行又周南老正道有
至正丁酉冬督役城虎邱詩八首一云奉檄趨功城虎

邱一云四疊新城遠澗隈一云百萬城春落杵齊虎邱
築城吳人亦鮮有知者予嘗泊舟山後見遺址尙存

郭文字仲炳號舟屋滇中詩人

舟屋竹枝詞云金馬何曾半步行碧雞那解五更鳴儂
家夫婿久離別恰似兩山空得名顧仲瑛編入玉山雅
集則是詩元季已流播矣用修稱是永樂間人其集旣
不可得無由臆決偶閱柯暹東岡集附錄滇南別意詩
則平居陳郭四人之作皆存焉平名宣武林人居名廣
海昌人陳名謙吳人東岡跋云郭居皆武士中賢者郭

善詩文征南將軍都督沐繼軒璘師之居精吏事總府
辟掌簿書數十年得官陳官鎮撫有詩名宣則松雨先
生子也黔府西塾薦升廣南府通判所云松雨先生者
知藤縣事顯字仲微考東岡引疾去滇在景泰二年七
月別意詩卽是年之作郭於元時撰竹枝八明八十四
年未必尙存用修雖稱見其全集竊疑竹枝非集中詩
玉山雅集所載當別是一人也

附錄楊用修云滇中詩人永樂間稱平居陳郭郭名
文號舟屋其詩有唐風三子遠不及也其登碧雞山

太華寺一聯云湖勢欲浮雙塔去山形如擁五華來
一時閣筆信佳句也但全篇未稱耳

沙可學永嘉人元進士行省掾

楊廉夫有送沙可學序其畧云某官來總行省事求從
事掾之賢能者首得一人焉曰沙可學氏又得一人焉
曰高則誠氏又得一人焉曰葛元哲氏三人者用而浙
稱治三人者天府登其鄉書大廷榮其高等而拜進士
出身賜任州理佐理之職者也可學僅存詠懷詩云疏
鑿功成王氣衰九重端拱尙無爲貪夫柄國忠良沒巨

敵臨郊社稷危萬里朔雲沙漠漠六宮禁御草離離金
輿玉輅無消息腸斷西風白雁飛蓋憶庚申君北狩而
作首句指賈魯挑河言也

游莊字子敬

子敬所聞有感詩云塵飛鹿走力難任巡幸沙邊悔恨
深烏篆未經銜軹道龍文先自徙汾陰空傳行在淪孤
憤無復寰區遇八音聖德神功俱泯滅英雄千載一沾
襟蓋聞庚申君之訃而作也是歲庚戌北元人謚曰惠
宗其子嗣立於應昌改元宣光頒示高麗高麗不奉詔

故云無復寢區過人音既而北元主走和林沒諡昭宗
見鄒麟趾高麗史

王旬字子宣

高季迪以詩得妻王子宣亦以詩得妻子宣宮詞云南
風吹斷采蓮歌夜雨新添太液波水殿雲廊三十六不
知何處月明多諸家多誤作王叔明詩謂仁和俞友仁
見此詩歎賞曰唐人得意句也遂以其妹妻之考凌彥
神柘軒集有悼王叔明室張氏詩云結髮爲夫婦齊眉
若主賓山同黃鶴隱書逼彩鸞真蘭樹人皆羨蘋蘩爾

獨親情傷坦腹者臨穴重沾巾則叔明娶於張非俞也
故定以爲子宣作

附錄嚴蓀友云子宣宮詞不可謂不工矣然不若薩
天錫之入妙也薩詞云清夜宮車出上央紫衣小隊
兩三行石闌干外銀燈過照見芙蓉葉上霜

李鐸字振道隴西人

吳人徐達左良夫司訓建寧游乎武夷寫九曲權歌圖
書昔賢吟詠於前自紀其後復屬同人題句卷後題者
隴西李鐸臨川劉廉浚儀趙友士西甌馮回括蒼張思

齊鉅鹿林熙樵川蕭子和龍伯章隴右李裕三山周
甌寧葉俊建安楊恭葉季原蘇埤葉銘葉勝李佑龍虎
山人梁鶴凡一十八人續題者良夫兄子徐濟及青城
王璣也良夫居太湖之濱光福市闢耕漁軒以延名士
集其詩文爲金蘭集其好事亞於顧仲瑛云

范宗暉以字行寧波人

范君詩載滄海遺珠亦徙於滇者

鄭灝字仲養浦江人

浦陽義門有三其一黃氏自度至逢吉其一王氏自菱

至子覺皆止數世而已惟麟溪鄭氏族大且久先世自
滎陽徙欵再徙睦州其居麟溪自淮始淮之孫綺乾道
中賜號冲素處士朝請郎新淦晏穆志其墓是爲義門
第一世綺之子聞聞之子運運之子政政之子德璋德
璋之子文融文融嗣子欽仲養蓋欽之叔子也凡歷五
十三世一千六百六十餘年逮元季明初門才益盛曰
深曰濂曰源曰濤曰泳曰渙曰淵曰湜曰濟曰洧曰渭
曰溟曰沂出處不齊先後以才行著一門羣從又有櫛
槌杖枋材榦彬彬楷模桐柎棠機柏栝木皆爲士林所重

於是公卿大夫先後詩文貽贈者編爲麟溪集二十二卷洵盛事矣嗟乎江湖日下耷耷德色箕帚踞罵其不爲秦人之續者幾希錄義門子姓詩爲之三歎

王珙字廷珪常熟人明初處士有竹居詩集

竹居治生之餘不廢吟詠華幼武一流也詩嫌太熟

附錄李世賢云王君卜宅於虞山北之蕭溪植竹萬竿容與其中興之所寄輒形吟詠其詩和平典雅質不近於俚澹不流於枯

鄭榘字叔恭元宣政院使渭之子槌之弟從宋學

士游永樂初以薦授監察御史

叔恭宣撫廣東民以取珠爲苦至卽奏罷永樂十二年
年已七十有二矣值長陵埽平沙漠因進五言詩帝歎
曰可謂滿朝詩伯第一叔恭因告歸帝予勅書許致仕
賜宴於禮部昇以金繡衣問誰可代者叔恭舉從子焜
御筆卽除御史義門詡爲盛事

邱輔仁字友文歸安人

友文少有志行不樂華靡母衣之以絲帛赧顏不服長
博通經史恥爲章句之學潘元明據湖州使人召之亡

去洪武初始歸里業農終其身詩集失傳

謝林字璚樹武進人應芳子有雪樵集煮雪窩橐璚樹名林本係一人列朝詩集複出誤也

徐文舉武進人

金壇張德常起家吳縣丞歷縣尹遷嘉定州同知其行也諸名士分賦吳中舊蹟送之廣陵成廷珪得龍門廬山陳汝秩得采香逕宛邱陳秀民得靈巖吳郡鄭元得越公井錢唐范致大得石湖江陰張端得林屋館青邱劉埏得虎邱太原王逢得劒池薊邱聶鏞得天平山四

明陳朴得白雲泉會稽張憲得吳王井四明陳極得太
湖石勾吳周砥得洞庭山晉陵張體得琴臺巴西鄧德
基得玩花池清河張端義得錦帆涇崑山盧熊得館娃
宮吳郡王行得放鶴亭渤海高啓得響屨廊高郵龔宜
得梧桐園吳郡黃本得白公檜延陵徐文舉得百花洲
江陰張瑄得采蓮涇海昌董翔鳳得辟疆園無錫顧常
得夫椒山而遂昌鄭元祐亦賦采香逕且爲之序卷中
賦鱸鄉亭者脫去姓名吳人朱存理編鐵網珊瑚具載
其詩

顧協字允迪無錫人貢監生有鳴志集

允迪以諸生貢入成均詩有脫却朝衣換布衣之句則亦通朝籍者詩頗清穩五言如亂峰烟外紫殘日樹頭黃佳句也

鄔修字存誠南昌人洪武丁丑進士歷官太平知府

革除四載文獻無徵成化初吳人劉昌提督河南學政得建文元年湖廣鄉試棘闈倡和詩集中作者豫章胡儼若思鄔修存誠廬陵謝矩子方陳孔邱鄒陽洪

初善初閩張勉學思哲江陵熊釗伯機蜀川郭璠孟溫
聶潮貴廷輔會稽陳安惟康馬文炯 三衢張起師

震何遠思道清江袁士誨文政郟筒王景應星萬川冉
通穎達桂林唐昉景升維揚李輅文載柳州莫忠彥良
容山周迪遵道廣饒袁本子中凡二十一人昌鏤板以
傳且序之曰是科所取第一人實太師石首楊文定公
而胡公評其文謂能爲董子之正言不效公孫之曲學
愚按福建是科領解則建安楊文敏公明年文定文敏
俱成進士而胡文穆廣金文靖幼孜胡忠安澐顧端肅

佐皆建文庚辰榜釋褐者

陶琛字彥珩吳縣人

吳中徐達左良夫耕漁軒名士畱題甚衆朱德潤澤民
爲作圖仇機沙大用作傳高遜志士敏作記唐肅處敬
作銘王行止仲作序楊基孟載作說釋道衍作後序因
編爲金蘭集其十二世孫大業受業於子出先代所遺
詩箋百餘幅正草篆隸靡所不有如束筍然皆元季明
初諸公手蹟也未幾以訟破家悉爲有力者所得過眼
雲烟不復可觀矣惜哉自陶琛以下余震董遠三人均

集中詩

謝常字彥銘吳江人洪武中舉秀才召試丹鳳朝陽賦稱旨帝欲官之辭歸隱震澤東溪有桂軒

稟東溪集

彥銘楊廉夫弟子詩尙纖麗縣志稱洪武末舉秀才帝欲官之辭疾不拜考集中詩事在洪武十五年八月其詩云歸養慈親荷聖恩喜傳天語出金門河陽敢問花誰種彭澤應知菊尙存則以養親辭非以疾辭而所辭之官似屬縣令也又寄靈谷定巖長老詩序云不肖衰

朽目昏髯毛皆雪幸有老母百又六歲荷蒙恩渥勅許
終養足爲明證矣集又有永樂元年八月陪祀縣庠丁
祭及鄉飲分題之作句云喜當時盛陪清列或者曾攝
邑校邪

潘子安和州人有海天清嘯集

子安詩見湖海耆英詩集其字未詳吾鄉郁氏書畫跋
載有潘伯濟題畫詩云岷峨雪消春水急瀟湘雨餘雲
樹溼迢迢翠嶼孤鶴迴湛湛珠宮老蛟泣征帆數點風
濤中出沒不計天西東鄉關杳渺在何處矯首遙送雙

飛鴻全篇清婉繹其名字疑是一人然未敢臆決附錄
之俟再考

朱希晦樂清人有雲松巢集

處士元季與吳主一趙彥銘隱居鴈山時稱鴈山三老
明初不仕有薦於朝者朝命未至而卒集爲七世孫元
諫刊行其夏日書懷云白髮生涯人已老綠陰時節雨
偏多寄友云煙色春歸楊柳底雨香紅入杏花初傷時
云城邊向晚黃孤立海外何年白雉來自歎云家貧猶
具千金帚國難曾無一箭書訪僧云松陰夜靜鶴初警

花院日長僧未還皆佳句也

鄭洪字君舉永嘉人有集

鄭君舉詩一卷曹侍郎古林藏本侍郎題是永嘉人而鮮于伯幾書趙子固水仙卷稱元貞二年正月同餘杭盛元臣三衢鄭君舉觀于困學齋初疑君舉乃三衢人然考周元初來鶴詩有永嘉鄭洪君舉之作見鶴林類集則君舉爲永嘉人無疑來鶴事一在至正十七年一在十八年一在洪武十四年一在十五年一在二十七年

朱友諒嘗熟人詩見鶴林類集

友諒有周尊師禱雨歌尊師世居嘉禾從紫虛觀李拱
瑞爲道士李南谷杜真人高弟也周伯溫紀畧云先生
受法於顧養浩步雲岡雲岡受之張雷所雷所受之王
繼華繼華受之莫月鼎宋景濂傳畧云霄川有莫洞一
授其徒王繼華繼華授張善淵善淵授步宗浩宗浩以
授尊師禱雨事一在洪武元年一在二年永嘉鄭思先
序之思先詩云道人綠髮雙青瞳自言前身河上公歛
騎黃鶴辭帝宮歸來塵世發羣蒙海虞福地秀所鍾七

星老檜摩蒼穹道人重來御冷風屠維作噩歲式逢季
夏旱熯何熾熾縣令延師師說從飛書上奏徹九重鐵
券怒起神淵龍左驅飛廉右豐霽天地俄頃驚晦矇甘
霖注地疾若春千村萬落沾渥同頓回枯槁蘇疲瘥旋
幹造化非常功道人拂袖喜滿容笑指霽日扶桑東其
篇法頗與友諒相近然不若朱之朗朗也思先官至福
建布政而溫州府志失載

按友諒周尊師禱雨歌云道人鞭龍出潭底黑雲一
片山頭起仰看紅日不見光黑龍頭搖白龍尾有時

登壇步七星一呼一吸成雷霆白波翻空海水立銀
河落地天瓢傾去年京師禱雨雨輒至大田小田總
霽霈定知夜半拜封事自有精誠感天地王公貴人
知其賢屈師闡教來琴川今年旱魃又爲虐禾稼半
死民熬煎縣官投詞庶人跪道人受命應且喜笑書
鐵牌役海鬼疾驅一百五十里甘泉龍居萬丈深神
符召集如飛矢今朝雨脚來自南半是吳江四橋水
頂山有龍名太白口噴湖水成甘澤道人驅龍喝龍
出五雷使者閒不得龍兮龍兮一喚日失色金蛇掣

電光千尺再噴山氣黑飄風盤旋走沙礫上天有寶
不愛惜噴下驪珠千萬石兩龍行雨勢未休須與潦
水平田疇疲農入城報沾足道人一笑山雲收

胡溫字遵道會稽人

溫異人也少落魄湖海間後入閩性好飲不常得人方
置酒不問主客徑造飲酒盡不謝而去日出行市中羣
小兒逐之呼曰風子溫顧而自笑夜宿古祠下雖寒冬
雪甚衣布單衣履草履身不顫慄人或遺以衣行不數
步遇寒者輒解予之駙馬都尉王恭守閩孝陵賜以織

金袞衣僉具酒賀溫突入曰某亦賀公持酒覆其衣恭
不爲忤溫亦自若漳帥徐玉好士溫特過其家玉召飲
同官俄而溫至歌詩起舞至慢罵坐客玉亦不厭也過
元漳州守迭理迷世祠酌之水祭以文曰衆之生不如
侯之死侯之死名長在此萬歲千秋元之臣子拜已大
笑而出著書名曰竹帛流芳載元忠臣義士并貞烈女
敘其本末系之以辭類饒歌輕重皆有深意一日告徐
玉曰吾將歸矣負橐行三舍爲關卒阻而回發橐中止
有硯一易酒飲之起舞作喜鵲之歌曰閩山喜鵲少越

山喜鵲多如何不歸去其奈羅網何歌畢仰戶而死時
洪武七年冬也玉葬之漳州西門外天台林公輔爲作
胡風子傳其大畧如是公輔稱其生死如在己蓋冷謙
張邈邊周顛仙一流

方孝孺字希直一字希古臨海人建文中文學博
士靖難兵至首以身殉沒後嚴禁文字門人王
稔藏之傳有遜志齋集

正學先生文昌明博大開闢自如雖有小韓之名實與
大蘇相埒潛溪學士贈詩云方生來海上玉立而春溫

同餐太倉粟共勘典與墳澆蒼扣無始溟滓窮無垠宇
宙所管攝載籍所敷陳終始鈎鉗之若大樂建鈞律呂
按高下宮商肅君臣黃鐘壓瓦釜庭燎滅鬼燐以茲稽
古力可敵戡定勛濡毫寫雄顛勢足移峨岷漏泄渾沌
竅出入造化神盡抽神奇祕不墮臭腐塵所以自出之
愈見光景新振古著作家後先各繽紛豈知萬牛毛難
媿一角麟葉夷仲亦贈詩云雄文細字塞巨帙雅辭宏
論開心扁其險過雲漢其幽通窈冥瞻如戈甲積晉庫
奇如盤鼎鑄商銘麗如勾芒青春布花卉壯如豐隆白

日驅雷霆千流萬派怒奔放終然帖帖趨東溟持以用
世不啻如養生之穀粟濟疾之澆苓直須上追虞書姬
周雅於以作春秋之羽翼爲禮樂之藩屏其傾倒也至
矣說者謂先生詩非所長然五言熟精選體當在潛溪
華川之右其談詩絕句云舉世皆宗李杜詩不知李杜
更宗誰能探風雅無窮意始是乾坤絕妙辭又云前宋
文章配兩周盛時詩律亦無儔今人未識崐崙派却笑
黃河是濁流又云天歷諸公著作新力排舊習祖唐人
粗豪未脫風沙氣難抵熙豐作後塵其意蓋辨香東坡

居士也予謂先生宜配食孔子之庭嘗贊柯納言聳疏
請于朝 廷議以先生但能成仁不可謂道學且祇
有文集而無語錄以是抑之納言幾獲罪不知語錄乃
浮屠家法耳祀典闕如不能無望于後之君子

黃子澄初名湜以字行更字伯淵分宜人洪武乙
丑賜進士第三除編脩歷脩撰累官太常寺卿
兼翰林院學士靖難師入磔死

太常受易于歐陽貞受書于周與學受春秋于梁寅初
謁寅時寅令其作枯梅詩立就甚異之詩云百千年樹

未全枯三五个花何太疎聞道石門春意動不知曾有
暗香無石門寅所居也

練子寧名安以字行號松月居士新淦人洪武乙
丑賜進士第二授翰林院脩撰陞副都御史工
部侍郎建文時遷御史大夫靖難師入不屈死
有金川玉屑集

革除詩文之禁甚於元豐然遜志之集金川玉屑之編
久而日星不滅也是編至正德中始出其詩娟秀妍雅
七言如丹梯下壓龍蛇窟鐵鎖高懸虎豹關司馬豈無

乘駟日終軍又是入關時旋沽南石橋邊酒走送東風
江上船一水東來通漢沔諸峰西上接岷峨殘碑墮淚
空秋草折戟沈沙自夕陽飲馬窟深泉脈暖射雕風急
雪花寒天垂鉅野河流急秋盡江南木葉疎莫怪風流
謝安石未應憔悴沈休文皆泠然可誦

王叔英名元采以字行黃巖人洪武末爲仙居教
諭陞漢陽知縣建文元年召爲翰林脩撰靖難
師逼江奉詔募兵行至廣德自經於元妙觀有
靜學齋橐

先生令漢陽日遺書希直云凡人有天下之才固難能自用其才者尤難如子房之於高祖能用其才者也賈誼之於文帝不能自用其才者也天下之事固有行於古而亦可行於今者如夏時周冕之類是也亦有行於古而難行於今者如井田封建之類是也可行者行之則人之從之也易難行者行之則人之從之也難從之易則民樂其利從之難民斯受其患矣此君子用世貴乎得時措之宜也可稱希直諍友白首同歸不渝霜雪古人哉

周是脩名德以字行泰和人洪武中舉明經由霍
邱訓導歷周府紀善改衡府靖難兵渡江入應
天府學自經死有芻蕘集

紀善詩最傳者長安古意一篇李時遠云可與初唐四
子相埒近陳卧子論詩甚嚴選明三百年詩寥寥數卷
是篇特見錄亡友陸麗京亦亟稱之云是神龍景雲以
前風調子謂此等詩但似古人骸骼無關性情就芻蕘
集中擇之不若牧童謠一首猶存張王遺韻也其辭云
遠牧牛朝出東溪溪上頭溪頭草短牛不住直過水南

芳草洲脫衣渡水隨牛去黃蘆颯颯風和雨老鴉亂啼
野羊走絕谷無人驚四顧寒藤枯木暮山蒼同伴相呼
歸又忙石稜割脚茅割耳身上無有乾衣裳却思昨日
西邊好曠坂平原盡豐草短蓑一卧午風輕長笛三吹
夕陽早

程本立字原道崇德人洪武丙辰以明經薦爲秦
周二府引禮謫雲南馬龍他郎甸長官司吏目
建文初徵入翰林陞僉都御史靖難兵至自經
於應天府學有巽隱集

建文諸臣文莫過方希直詩莫過程原道希直之文取
法昌黎下亦不失爲蘇子瞻原道之詩刻意杜陵下亦
不失爲陳簡齋也

茅大方字希董泰興人洪武中爲淮安府學教授
擢秦府長史建文時官右副都御史靖難兵至
死於難有希董集

希董集流傳未廣集中如萬山入漢秦關險孤棧連雲
蜀道難縱使火龍蟠地軸莫教鐵騎過天河花間鶯避
春城仗林杪僧歸晚寺鐘萬里不來青鳥使千年空老

碧桃花皆佳句也

胡閏字松友鄱陽人舉秀才授都督府都事進經
歷建文中官右補闕陞大理少卿靖難師入不
屈死

長陵靖難受禍者莫慘於正學先生坐方黨死者相傳
八百七十三人其次黃太常坐累死者族子六十五人
外戚三百八十人若胡大理之死郡志稱其族棄市者
二百十七人坐累死者數千人妻斃於獄有把與狗喫
了之旨載奉天刑賞錄不知何以若是慘毒有過於方

黃者國史既沒其實不可得而詳矣大理少與吳存輩講業長沙王吳芮祠中畫一松於壁題曰蒼蚪出壑系之以詩云幽人無俗懷寫此蒼龍骨九天風雨來飛騰作神物太祖平陳友諒下饒州過而見之喜甚問得其名及舉秀才入見帝曰此題詩鄱陽廟壁者邪因令通籍不遺一善若此

劉璟字仲璟青田人基次子授閭門使尋爲谷王府左長史靖難師入稱疾不起下詔獄自經死有易齋無隱二集

仲璟爲伯溫仲子洪武辛未攜兄子鴈詣闕帝命其襲
父爵仲璟謝曰有先兄臣璉之子鴈在不敢越禮乃設
問門使處之天台盧廷綱稱其詩云酒酣落筆詞愈工
命意不與常人同清如水甌玉盃貯繁露和如大廷清
廟鳴絲桐疾如黃河怒風卷濤浪麗如錦江秋水涵芙
蓉譽之未免過實

高遜志字士敏蕭縣人徙居嘉興洪武初召脩元
史入翰林爲編脩累遷侍講學士建文時加大
常寺少卿靖難後死永嘉山中有菴菴遺橐

高季迪送唐處敬序云予世居吳北郭同里友善者惟王止仲一人十餘年來徐幼文自毗陵高士敏自河南唐處敬自會稽余唐卿自永嘉張來儀自潯陽各以故來居吳而皆與予鄰於是北郭之文物遂盛矣是北郭十友其初士敏處敬與焉其後徙居橋李是以季迪懷十友詩不及也太常之死傳聞異辭革除遺事及吾學編皆云靖難師起存沒無攷劉琳拊膝錄謂盛庸兵敗自經柳玟嘉興府志謂卒于官趙太守瀛撰嘉興圖紀稱太常卒諡文忠彭比部輅亦云未知何據亡友蔣之

翹楚稭嘗出其族譜有遠祖兢仕讓皇帝爲文淵閣侍書實太常弟子有祭太常文其畧云歲在壬午九月晦吾師士敏高先生卒師以國破家亡遁影東甌蕩山中頽齡疾苦僕從竄逸隻影自矢爲西山餓夫天假之合小子兢亦以未死之身來偷息於此想對若夢寐淚涔涔下侍吾師廬五十日吾師竟長逝就瞑之頃指畫恨字旣而曰復何恨復何恨者正吾師泣血椎心萬古耿耿之長恨也兢窮塗無以成禮林有巨木遭伐其腹枵然乞諸樵叟斂而葬之芙蓉峰北嗚呼天降喪亂蕭

精禍起君國殄瘁臣所當死博浪無椎環柱失七遁跡
空山潔身以俟邂逅之間師師弟弟命之窮兮師疾不
起爲營一坏山崖水涘杖履莫追涕泗曷已然則金川
門師入之後太常自潔其身遠遯未嘗卒于官其詩有
云生死尙無懾寵辱何足驚蓋矢之有素矣列朝詩集
據鶴林集云太常作周尊師傳後題洪武三十五年歲
次壬午春正月初吉前吏部侍郎太史河南高遜志又
祈雨詩後書云河南高遜志大明洪武吏部侍郎因疑
革除之後不署建文職官故稱洪武第壬午正月靖難

師尚未渡江讓皇帝猶在位豈有預書洪武三十五年之事乎攷革除之命是年七月始下則二書題名蓋出於道士未足依據也嗇菴遺彙詩文各一卷太常十世孫佑鈺博采成編

蔣兢字維敬自宜興徙嘉興建文初舉人才授文淵閣侍書

建文諸臣自吾學編名山藏副書史待史竊史槩而外黃佐有革除遺事高璧有幽光錄袁祥有建文私紀陳洪謨有革除編年許相卿有革朝志陸時中有建文逸

史姜清有祕史王會有野史袁褫有奉天刑賞錄劉琳
有拊膝錄屠叔方有朝野彙編宋端儀有革除錄朱睦
㮮有遜國紀林塾有革除史補郁襄有革除遺忠錄杜
思有革朝遺忠錄鄭應旂有革朝遺忠列傳張朝瑞有
忠節錄攷誤徐卽登有建文諸臣錄焦竑有遜國忠節
錄汪宗伊有表忠錄趙士喆有建文年譜趙啓元有遜
國續鈔錢士升有遜國逸書陳仁錫有壬午書朱鷺有
建文書法擬劉廷璽有遜國之際月表曹參芳有遜國
正氣紀周鏞有遜國忠紀周遠令有讓皇帝本紀高世

豐有盡心錄以及奉天靖難記建文事迹建文君臣逸
事革除漫錄革除紀遺遜國臣紀羣忠事畧就義編紀
述者不爲不多矣然類皆惑於從亡致身二錄舉凡河
西傭東湖樵夫雪菴僧補鍋匠一一以姓名實之而吾
鄉若姚侍御瑄以姦黨誅籍見成祖實錄顧諸書反不
及焉又北平所司州縣官以靖難師起棄職遠避有朱
寧等二百一十九人寧亦未有登載者至於侍書之葬
其師則諸公所未及知也予嘗面請學使者以程公本
立姚公瑄楊公任高公遜志建四忠祠於嘉興而以侍

書配食於高公之右學使者諾而不果行也世有主持
風教者表忠之典冀吾黨君子留意焉

鄭桓字居貞歙人洪武中舉明經官至河南左參
政承樂初坐方黨死有閩南關隴歸來檜庭諸
稟

侯城取友於林公輔鄭居貞最親故其詩云雄文不見
林公輔病眼荒荒何處開又云每懷樗散鄭司戶喜看
杞梓作孫枝又云林鄭爲文學我家波瀾議論闊無涯
又送居貞入成都詩云兩生萬里來講道慰寂寞寧知

事多忤重使欲離索林也前歲歸重來忘曩約鄭子今
復去南行踰嶽寧疑經待同勘蕪史期共削相須左右
肱理勢不可各金門盛才彥德星耀井絡翩翩白鳳羣
豈復少一鶴蓋居貞有翩翩紫鳳雛一篇贈侯城行故
簪及之也遣意詩云相對靡俗言共譚止書詩遐情或
深契歡笑同解頤於心有至樂天地亦可遺贈別詩云
丈夫平生懷豈惟安其身則以古道相勗矣侯城遇林
鄭殆弟子而兼朋友者居貞坐方黨死於南京其餘弟
子未至作瓜蔓抄也鄭詩傳者無幾林尤罕見曩在都

日梁溪顧梁汾典籍得其手抄文集塗乙尚存尋歸之
崑山徐氏傳是樓惜未及謄其副至今耿耿於懷侯城
高弟惟王叔豐最傳誦集中感舊詩有云杯酒論心有
幾人天台張穀舊相親精通八法楊文遇暗誦五經陳
用中立言溫粹懷陳采肆筆縱橫憶鮑岡寫懷有云伯
尚庭前傾竹葉用中宅畔看梅花假有好事者爲之著
錄以之配食於木末祠中亦勝舉也

葉見泰字夷仲臨海人刑部主事有蘭莊集

夷仲侯城之友其贈侯城詩云我友方濟寧有子字翁

直而侯城集中有祭葉主事文云昔我先公與公最懽
我爲童穉輒觀公文謂公名人非我敢見乃辱愛知不
我愚賤譽我勉我待以友朋再薦而起實忝同徵舟行
千里連牀接膝飛觴賦詩樂意橫溢蓋論交在紀羣之
間者也